

# Kerepek lesap dilarikan pencuri

Pengusaha kerugian RM7,000 apabila premisnya dipecah masuk penjenayah

**BANTING** - Sebuah kedai kerepek di Kanchong Darat di sini, mengalami kerugian kira-kira RM7,000 apabila pelbagai barangan termasuk 60 bungkus kerepek lesap dilarikan penjenayah yang memecah masuk premis berkenaan, kelmarin.

Kejadian dipercayai berlaku kira-kira jam 6.45 pagi itu disedari pemilik yang datang ke premis berkenaan dan melihat kerepek bertaburan di atas lantai.

Ketua Polis Daerah Kuala Langat, Superintendan Azizan Tukiman berkata, terdapat kesan umpil pada pintu hadapan selain premis berselerak ketika kejadian an disedari pemilik.

"Pemeriksaan lanjut mendapati dua mesin juruwang, sebuah tabung anak yatim dan 60 bungkus kerepek hilang dan pemilik di-



Sebuah premis menjual pelbagai peralatan restoran dan bahan membuat kek di Banting dipecah masuk awal pagi semalam.

anggarkan mengalami kerugian RM7,000.

"Siasatan di lokasi kita menemui satu kesan cap jari pada balang kuih yang

terdapat di kaunter dan kita sudah menghantar kesan cap jari itu ke unit forensik," katanya ketika dihubungi di sini, semalam.



Kedai berselerak di bahagian dalam kedai kerepek di Kanchong Darat, Banting.

Menurutnya, siasatan masih diteruskan dan pihaknya percaya kejadian itu membabitkan lebih seorang suspek.

Dalam pada itu, Azizan berkata, sebuah premis menjual pelbagai peralatan restoran dan bahan membuat kek di sini turut

dipecah masuk semalam hingga menyebabkan pemiliknya kerugian kira-kira RM3,500.

"Kejadian kira-kira jam 8.30 pagi itu disedari salah seorang kakitangan yang baru datang bekerja dan melihat barang-barang di dalam kedai berselerak selain laci wang dan loker pekerja diselongkar.

"Berdasarkan siasatan awal suspek dipercayai memecah masuk ke dalam premis melalui bahagian tepi kedai. Namun siasatan lanjut masih dijalankan berdasarkan rakaman CCTV di premis tersebut," katanya.

Menurutnya, kedua-dua kes yang berlaku pada dua hari berturut-turut itu kini disiasat di bawah Seksyen 457 Kanun Keseksaan kerana melakukan pecah masuk premis.

## Lebuhraya Mex 2 bantu atasi laluan sesak



Sebahagian penduduk di Dun Dengkil gembira menerima kunjungan Shahrum yang menyampaikan sumbangan pada program Ziarah Kasih.

**SEPANG** - Penduduk di Dun Dengkil bakal menikmati kemudahan Lebuhraya Mex 2 yang menghubungkan Putrajaya ke KLIA selepas ia dijangka siap dalam tempoh dua tahun.

Adun Dengkil, Shahrum Mohd Sharif berkata, pada 2019 juga pengguna akan dapat memanfaatkan persimpangan bertingkat di simpang empat Dengkil yang kini dalam peringkat akhir pemilihan kontraktor.

"Lebuhraya Mex 2 akan dibina sepanjang 16 kilometer (km) sementara flyover simpang empat Dengkil kini mempunyai tempoh dua bulan untuk melantik kontraktor yang layak.

"Saya yakin kedua-dua projek ini akan dimulakan pada tahun ini dan ia akan menjadi kemudahan kesejahteraan rakyat yang sudah diperjuangkan lebih dua ke tiga ta-

hun," katanya ketika ditemui dalam program Ziarah Kasih, di sini.

Menurutnya, pembinaan tersebut juga dijangka membantu melancarkan aliran trafik dan mengurangkan kesesakan seperti yang sering dihadapi penduduk.

Sementara itu, seorang pengguna, Mohd Rafiq Ahmad, 34, berkata, dua laluan sesak itu sering digunakan dan mengharapkan ia segera dinaik taraf.

"Sekiranya kemudahan ini dapat dilaksanakan pasti memberi kegembiraan kepada ribuan pengguna jalan di kawasan itu kerana tak perlu berdepan dengan kesesakan lalu lintas lagi," katanya.

Dalam program itu, seramai 1,600 asnaf termasuk orang miskin, ibu tunggal, orang kurang upaya (OKU) dan warga emas menerima bantuan.

**INFO**  
 • Rumah Terbuka Jamuan Eidulfitri Adun Tanjung Sepat, Ir Mohd Haslin Hassan  
 Tarikh: 8 Julai  
 Masa: 2.30 hingga 5.30 petang  
 Tempat: Dataran Pantai Batu Laut

• Majlis Rumah Terbuka Aidilfitri Adun Dengkil, Shahrum Mohd Sharif  
 Tarikh: 9 Julai  
 Masa: 10 pagi hingga 4 petang  
 Tempat: Pekarangan Pusat Khidmat Adun Dengkil  
 \* Semua dijemput hadir

## Bapa mohon cari Aishah Natasha

**KUALA LANGAT** - Seorang bapa memohon bantuan orang ramai mencari anak perempuannya berusia 15 tahun yang dipercayai hilang selepas keluar dari rumah mereka di Taman Jugra Jaya, Banting, semalam.

Anak kepada pemandu lori, Nasaruddin Abdullah, 57, dipercayai keluar dari rumah kira-kira jam 1 pagi tanpa memberitahu ahli keluarga yang lain termasuk ibunya.

Nasaruddin berkata, dia baru sahaja pulang ke rumah dan mendapati pintu rumahnya terbuka sebelum menyedari anaknya, Aishah Natasha tiada di dalam biliknya.

"Ada jiran bagi tahu anak saya naik Limo Innova berwarna biru atau Perodua Myvi berwarna putih sebab dua kenderaan itu saja didapati keluar dari taman ini.

"Sehingga sekarang pelbagai usaha dah kami lakukan untuk kesan anak saya termasuk carinya di sekitar Banting selain bertanya rakan-rakan sekolah dan hebahkan kehilangannya dalam media sosial," katanya.

Menurutnya, laporan kemudian dibuat di Ibu Pejabat Polis Daerah (IPD) Kuala Langat, di sini, selepas remaja berkenaan yang hanya membawa dompet dan telefon bimbit gagal dihubungi ahli keluarga.

"Tak ada pula berkelakuan pelik sejak ke-



Aishah Natasha dipercayai hilang selepas keluar dari rumah di Taman Jugra Jaya, kira-kira jam 1 pagi semalam.

belakangan ini tapi Aishah yang juga anak keenam daripada tujuh beradik ini tak pernah keluar seorang diri. Kalau nak pergi mana-mana saya akan hantar.

"Saya percaya anak mungkin ikut seseorang tapi tak tahu ke mana," katanya.

Orang ramai yang temampak Aishah diharapkan dapat menghubunginya di talian 019-2580310 atau 011-25819668.